

EUROPAKO BATASUNA. 2004an abiatuko da

Euroaginduari Italiak emaniko baiezkoa ontzat jo dute Hamabostek

Berlusconiren gobernuaren zehaztapenak eraginik ez dute izango erabaki esparruan

Agentziak | BRUSELA

«Akordio politikoa» lortu dute Hamabostek, atxilotze eta emate agindu europarrari buruz. Italiaren konpromisoa aintzat hartu, eta Silvio Berlusconi gobernuak euroaginduari alde bakarrez eginiko zehaztapenak ontzat jo ondoren —erabaki esparruaren testua aldatu gabe—, Europako Batasuneko hamabost estatuek aho batez eman diote baiezkoa atxilotze eta entregagindu europarrari.

EBko Justizia eta Barne ministroen Kontseiluan, aurreko asteburuan, Italia izan zen alde agertu ez zen bakarra, eta euroaginduari buruzko Hamabosten akordioa blokeatu zuena.

Batasuneko enbaxadoreen bileran, atzo, Italiak hamalau bazkideei aurkeztu zien Silvio Berlusconi gobernuburuak bezperan hartutako konpromisoa. Italiaren jarrera eta prozedurari buruzko zehaztapenak bilkura-ko aktan jaso zituzten enbaxadoreek, euroaginduaren erabaki esparruaren testuan bildu gabe. Hamalau hitzartutako testua, beraz, bere horretan onartuko dute Hamabostek.

Italiaren adierazpenak, bere legeria euroaginduari egokitzea jartzen du baldintzat. Horrek Italiako Konstituzioa aldatu beharra ere eragin dezake. Neurri bera hartu zuten aurrez Suedia, Danimarka eta Holandak ere.

Nolanahi, Italiaren zehaztapenak «balio juridiko eskasa» dutela adierazi zuten atzo Batasuneko iturriek. 2004ko urtarri-laren 1ean jarriko da indarrean euroagindua; ordurako, nork bere legeria eta prozedura juridikoak egokitu beharko ditu. Italiak uko egingo balio horri, Europako Batzordeak salaketa jartzeko aukera izango luke Europako Justizia Auzitegian.

Horrenbestez, Hamabosten adostasuna lortuta, EBko estatu eta gobernuburuak asteburuan Laeken (Belgika) egitekoa duten Goi Bileran euroagindua ez da eztabaidagai izango. Akordioari oniritzia ematera mugatuko dira. Europako Parlamentura urgentziaz igorriko dute orain, atzo lortutako akordioa, eta, tramitezko onespina jaso ondotik, EBko Ministroen Kontseiluak emango dio argi berdea euroaginduari, Batasuneko iturriek adierazi dutenez.

IU. Proposamena ez dela «legezkoa» berretsi du

IUk zuzenketa jarri du Batasunaren diru laguntzak eteteko neurriaren aurka

Agentziak | MADRID

Gaspar Llamazares IUko koordinatzaile nagusiak atzo jakinarazi zuenez, hauteskundeetarako Batasunari eman beharreko diru laguntzak blokeatzeko PPK aurkeztutako proposamenaren aurkako zuzenketa ezarri du Senatuan bere taldeak.

PPren neurria «legez kanpoko eta Konstituzioaren aurkako» dela berretsi zuen Llamazaresek eta Espainiako Gobernua «Eskubide Estatutik

kanpo» ari dela adierazi zuen. Batasunaren izaera demokratikoa ez dela «nahi adinakoa» esan zuen, baina legezotasuna ezin dela «bortxatu» gaineratu zuen. «Aznarren bide-zidorrek bera ahultzen dute eta terroristei eta horiek babesten dituztenei aitzakiak ematen dizkiete», esan zuen Llamazares.

Batasunaren kontrako isunak

PPko legebiltzarkide Carlos Urquijok «ardura handiagoa» eskatu zion atzo Eusko Jaurlaritzari «ETAre inguruari eta Batasunari isunak jartzerakoan eta horiek kobratzerakoan». Aurretik jakitera ematen ez diren elkarretaratze eta manifestazioengatik jarritako isunez aritu zen Urquijo.

LABURREAN



JOSU ETXEBARRIOSTE

LABeko kideak Bilboko Justizia Jauregiaren aurrean.

LABek elkarretaratzea egin zuen, atzo, Bilbon, «neurri errespesiboen eta sakabanaketaren aurka»

Egungo kartzela politika salatzeko, elkarretaratzea egin zuen LAB sindikatuak, atzo, Bilboko Justizia Jauregiaren aurrean. Bildutakoek, «sakabanaketaren ondorio ekonomikoak eta pertsonalak» deitoratu zituzten. Era berean, «neurri errepresiboak eta sakabanaketa ez direla gatazka politikoa konpontzeko bidea» berretsi zuten. LABek adierazi du azken 15 egunotan, Ertzaintzak eta Guardia Zibilak 140 pertsona baino gehiago «errepresaliatu» dituztela, eta horietarik gehienek torturak salatu dituztela gogorarazi.

Andoni Cabello presoaren senideek auto istripua izan dute espetxeko bidean

Andoni Cabello euskal presoaren senitartekoez auto istripua izan zuten atzo Langraizen, Castelloko espetxera aurrez aurrekoa egitera zihoazenean, Etxerategi jakinarazi zuenez. Autoan Cabelloren izeba, lehengusua, koinata eta bi urteko iloba zihoazen. Bidaiari bati lepokoa jarri zioten eta aurrez aurrekoa ezin izan zuten egin.

Xabier Garcia preso donostiarra aske da hamar urteren ondoren

Xabier Garcia Garmendia euskal preso aske geratu zen atzo Langraizko espetxetik, hamar urte eta lau hilabete preso pasa ondoren. Denbora horretan Carabanchel, Alcalá Meco, Soria, Huelva eta Langraizko kartzeletan egon da. 1999an bete zituen zigorraren hiru laurdenak. AABek salatu zuten, «bahituta egon da bi urtez». Espetxe atarian harrera egin zioten lagunek.

Euskal presoek aldeko ekimen bateratuak egingo dira, gaur, Bizkaiko campusetan

Bizkaiko Campusetako Euskal Presoen aldeko Batzordeak ekimen bateratuak antolatu ditu gaurko Bizkaiko campusetan. Bilboko Ingenieritza Eskolan konpromiso eguna izango da, Leioan enkartelada mugikorra 12:30ean, Deustun enkartelada 11:00etan eta Irakasleen Eskolan elkarretaratzea 13:00etan. Euskal presoek euskal herriratzea, zigorraren hiru laurdenak bete dituzten presoak eta sendaezineko gaixotasunak pairatzen dituztenak kaleratzea eskatzen du batzordeak.

Rafael Veraren absoluzioa eskatu du bere abokatuak

Segurtasunerako Estatu idazkari ohi Rafael Veraren absoluzioa eskatu zuen atzo bere abokatuak, *diru bereiziei* buruzko epaiketan. Luis Roldan Guardia Zibileko zuzendari nagusi ohi eta Julian Sancristobal Segurtasunerako zuzendari ohiaren deklarazioek ez dutela baliarik argudiatu zuen Veraren abokatuak.

'Marey kasu' -koek zigorra espetxean betetzea ez dela bere erabakia dio Gorenak

Auzitegi Gorenak atzera bota du *Marey kasuko* herri akusazioak aurkeztu zuen eskaera. Auzi horretan zigortutakoak espetxeratu eta berehala aske utzi zituztelako egin zuen eskaera. Gorenak, ordea, esan du zigorrak nola betetzen diren erabakitzea Espetxe Zaintzako epailei dagokiela.

OROIT ETA SALA

Demokrazia eta errepresioa aztertuko dituzte Baionan asteburuko hitzaldietan

Eneko Bidegain | BAIONA

Oroit eta Sala elkarteak laugarren aldikotz antolatuko ditu hitzaldiak Baionan. Aldi honetan, «demokrazia eta errepresioa» gaia landuko dute. Hitzaldiak heldu den larunbatean eta igandean iraganen dira Baionako Polo Beyris-ko MVCan. Poliziaren jarrerak aztertuko dituzte batez ere. «Testuinguru antiterrorista batean, Poliziaren ekinbidea lerratze orotarako proposa da» adierazi zuen Koko Abeberri Euskal Herriko giza eskubideen babes elkarte (CDDHPB) kideak. Perpignan-ko akordioak «zenbait militanten aurkako neurri errepresiboak bizkortu eta erraztuko» dituela azpimarratu zuen.

Egoera horretan, Poliziak «betekizun ikaragarria» du. Hamazazpi errefuxiatuen kasua eman zuen adibidetzat. Poliziak haiei buruz bete txostenetan eta susmoetan oinarritu direla salatu zuen. Hitzaldietarik batean Didier Rouget abokatuak parte hartuko du eta Europako polizia kooperazio berria azalduko, igande gozian. Torturaren eta presondegiaren gaiak ere barnatuko dituzte.

Baina ez dute bakarrik Poliziak Euskal Herrian betetzen duen eginkizuna komentatuko. Adibidez, 1961ean aljeriar manifestari batzuen kontra, Parisen, Poliziak burutu «sarraskia» ere landuko dute, film baten bidez. Hiri handien bazterretako egoera aipatuko dute eta batez ere immigratuek Poliziaren-gandik jasotzen duten tratua, Mohamed Hocine, Immigrazio eta hiri bazterretako mugimenduko kidearekin.

Hitzaldi ugari

Hitzaldiak larunbat arratsaldeko 15:00etan abiatuko dira. Lehenik, Maurice Rajsfus, Askatasun publikoaren behatoki lehendakaria mintzatuko da Poliziaren azken berrogeita hamar urteetako betekizunaz. Ondotik, presondegi baldintzak aipatuko dituzte Espetxeen nazioarteko behatoki kide batekin eta kondena luzea burutu duen preso batekin.

Igandean GALi buruz solastatuko dira. Emmanuel Pierre Guittet, Parisko ikerketa politikoaren institutuko ikerlaria izanen da hizlaria. Arratsaldeko solasaldia Torturaren Aurkako Taldeak ziurtatuko du. Torturari buruzko diapositiba emanaldia. Iratxe Sorzabalen lekukotasun grabatuak ere emanen dituzte.